

9 May 2016 (Mon)

『YO Dancical 慶功宴』

首先,我要多謝周大福珠寶對 YO 狂舞派對同 YO Dancical 連續 3 年支持同厚愛,亦都多謝黃紹基先生同佢嘅團隊出錢出力,仲贊助埋呢個慶功宴,衷心感激。

我亦好開心今年基哥出席 YO Dancical 2016,見證咗我地年青人嘅舞藝同表演,更加肯定佢地值得你地嘅支持,亦希望你地一直支持下去。

過去 3 年,我好好彩可以陪住 YO Hip Hop School 同 Dancers 仲有 AS Production 的成長,2014 『築福香港』開始,我地將 YO 街舞由街頭跳到舞台,第一年綜合性,我覺得已經好喜出望外,第二年我地將小肥的故事搬上舞台。好開心見到小肥媽媽對佢跳舞嘅支持同認同!呢個我亦相信所有年青人透過舞台表演得到屋企人嘅肯定!

咁多年嚟,我地都係靠好多有心人同義工嘅支持,過去我地有黃志淙, Irene 同 Josephine. 今年佢地邀請到 Banky 楊秉基拔刀相助,指導大家,加入舞台劇表演元素同劇本處理,令整個製作更加完善,亦創造機會俾大家學多啲嘢,邁向興趣→專業→事業呢個 YO 目標。

今年,無啦啦我地又得到一個好靚嘅 Jocelyn 毛遂自薦加入,整個戲生色不少。Heart Grey 獨特嘅 Beat Box 表演亦都係好夠突出同有份量。

男神鳴燁的出現,我講到明係借力打力,要佢為『是師是徒』增加更多號召力,點知佢同阿齊呢個師傅又好合拍,亦帶出師徒之間,不分身分背景地位,人人都可以在別人身上學到嘢。

真係辛苦晒阿齊又要原著劇本.編舞,跳舞,仲要做埋戲。

全套劇個個 Dancers 都表現出色，小肥原來好有演劇天分，阿平同大媽阿 Ling 簡直係天生喜劇演員， Humor, 阿彬同耀樂都令人有深刻印象! 多謝各位 Dancers 落力演出!

不過仲有一個要多謝嘅係師傅仔浩南，你只得 8 歲，不過點到啲大人舵舵令，在座所有人都聽晒你話，包括高官同林鄭月娥司長，企起身跟你學跳舞，你睇你幾威!

I. 我想喺度講吓團隊精神: 今次成功演出有賴 Dancers 落力演出之外，台前幕後有好多人幫忙，AS Production, 燈光音響，道具等等，Clara 由頭到尾控制大局，仲要多謝 Ben, Peggy, 阿 Za, Janice, Joanna, 好多好多，多謝晒大家!

II. 自從 2014 年狂舞派對到 YO Dancical 2016, 我地不斷要靠 angels 同新 angels 加入。公關方面要多謝 Fiona Wan, Wasabi - Ruby, Kyme Chow- Chris/ Flora 同佢地啲同事，希望我地呢個義工團會不斷增長，發放無私精神，亦希望我地協青年青人喺日後唔好忘記回饋俾協青社。

III. 我希望在座年青人有個永不放棄精神! 跳舞，甚至滑板，攀石都令到大家為咗身體好，遠離壞習慣同壞朋友。

大家要記住做乜都好，除咗興趣，亦要堅持。有些人未必選擇教跳舞成為終生事業，但無論揀乜嘢工作，堅持同永不放棄精神一定要有。

最後講個好消息俾大家聽，4 月 16 號晚喺台上，我捉住楊釗先生，問佢我地送去美國 Broadway 同日本學嘢嘅年青人係咪發光發亮? 佢話好滿意，我又繼續問會唔會繼續支持協青獎學金，佢話好樂意! 於是我頭先打電話俾 Steven Leung，楊

釗先生的助手，佢話嗰晚由頭睇到尾好感動，旭日集團會繼續支持獎學金。

所以我想同大家講，俾心機跳舞，滑板，甚至攀石，每個人都有機會得到推薦獎學金去外國深造。

我講住咁多先，不過我跟黎明學咗嘢，而家唔興叫大家加油，要同大家講聲 Good Luck，多謝大家!